

Antoni Beline

O ALCI I MIEI VOI

Glesie Furlane 2000

“O alci i miei vôi viers lis montagnis” (Sal 121,1), là che e jè fluride la prime flôr di Aquilee, la glesie di san Pieri di Zui in Cjargne, cu la sô storie gloriose e tormentade, sacrificade come simpri sul altâr des resons politicis e de prepotence; là che e jè floride chê civiltât, chê invidualitât e identitât e peculiaritât che no à pierdût il so sflandôr nancje in cheste stagjon di angunie; là che si è svilupade chê interdipendence e interazion, chê identificazion fra om e tiere che e jè stade e e sarà par simpri il spieli e la misure di une autentiche civiltât, tant plui preziose in chesc’ tims calamitôs di dissacrazion, di disarticolazion, di disarmonie, di incomunicabilitât fra l’om e il so habitat; là che la fantasie de nature e la creativitât artesanâl dal om e à savût creâ un ambient san, biel, armonic, composit ma no confusionât e conflituâl, di mût che tu puedis sintîti ben e in pàs sot i trâs di cjase, sot i cops de glesie o sot la volte dal cîl, dal moment che dut al è cjase e glesie e creât; là che la saldece des monz e la bielege de nature cu lis sôs mil sfumaduris in colôrs e odôrs e sunôrs e à savût compagnâ e ispirâ lis mil sfumaduris e variacions di caratar, di lenghe e di cjant de sô int, dute compagne te sostance e dute diviersificade te realizazion concrete di cheste uniche potenzialitât; là che a nassin lis risultivis des aghis che a fecondin la nestre tiere e a distudin la nestre sêt e insieme lis risultivis plui gjenuinis dal nestri jessi furlans, di mût che se e sparîs la Cjargne nol à plui sens fevelâ di furlanetât, come che dut si desertifiche e al mûr di sêt se si suje la nassin; là che a son ancje lis mês lidrîs umanis e cristianis e là che o ài passât i agns plui frescs de mê vite di om e di predi.

Pelegrin e penitent in tes glesiis...

O vœi jentrâ spiritualmentri, pelegrin e penitent, in chê glesiis e gleseutis e mainis che e àn segnât e consacrât e santificât ogni tassel

di cheste tiere-mari, cui siei sanz cussì espressîfs e cussì suturnos, cussì corporâz e cjarnins e cussì spirtuâi, cussì insedâz tal nestri mont e cussì trassendenz. O pensi a chês cjampanis e cjampanutis che e àn clamât, cu la stesse partecipade indiferece, a gjoldi par une gnove vite, a fâ fiesie par une gnove famee, a vaî par une existence rivade a la fin. Glesiis là che la int e sbrocave la sô anime cu lis cjantis plui bielis e incoradis, di gjonde e di lament, di vite e di muart, e che cumò a son sieradis, mutis, desertis. Glesiis là che ognune e veve il so repertori unic e origjnâl, la sô Messe grande e i siei gjespui, tramandâz cun gjelose fedeltât di une gjenerazion di cantôrs a l'âtre, e ogni fieste la sô peculiaritât. A Rualp e Val a cognossevin 30 letaniis cjantadis, une par ogni sere dal mê s di mai, cu la relative cjante, cence met in cont lis letaniis de Sense e chês dai sanz. Un patrimoni trascurât, vendût, bandît, rapinât, copât e soterât par meti il nuje e dut chest al è sucedût par colpe o negligence o conivence o latitance di chês glesie che si proclame vuardeane fedele des memoriis e dai valôrs, dai tesauris spirtuâi e culturâi, de vere ricjece dal om in tun mont mercificât e mercificant. Cui daràjal vôs a chês vôs distudadis, cui tornaràjal a viergi chês bocjs sieradis o stropadis, cui gjararàjal fûr dal simitieri des civiltâz e des culturis chês vitimis de nestre inciviltât e ignorance e incussience?

... in tes cjasis

O vuei jentrâ spiritualmentri, pelegrin e penitent, in chês cjasis cussì individualizadis te lôr coralitât, cussì dignitosis ancje te puaretât plui marcade, cussì religjosis che a semein glesiis, adiriture cu la crôs piturade in grant su lis planelis. Cjasis che e àn cognossude par secui la tragjedie de emigrazion, ancje se une emigrazion élitarie e di cualitât, come chês dai cramârs e chês dai mestris dal Sietcent, che e àn rivât a puartâ la nestre civiltât e creativitât in ogni cjanton d'Europe e a creâ ancje te plui piçule borgade cjasonis e palaz che no àn nuje ce invidiâ la siorie de sitât. Il Sietcent cjargnel, spielât te

architeture civîl e religjose, al à un respîr e une ricjece che âtris parz dal Friûl, plui furtunadis dal pont di viste gjeografic e economic, nancje no s'insumiin. Chest al depon a pro de inteligjence e de intraprendence di une popolazion che si spessee a dâj un etichete negative, usance la Beozie, vadî la mont de Grece, rispjet ai sflandôrs e a la batule de metropoli ateniense. Chês cjasis de Cjargne, e la int che lis à fatis e abitadis, e àn cognossût, oltri che la separazion e la dispersion migratorie, la puaretât di un teren misurât e magri, frazionât e scomut, lis consequencis des calamitâz naturâls e provocadis, usance i taramoz e lis vueris, la mancjance di un lavôr sigûr e pajât e duncje la precarietât, lis disgraciis piçulis e grandis che a no mancjn là che si à plui bocjs di sfamâ che polente o pan di dô. Il dut in tun isolament sociâl e structurâl vergognôs. Il stât talian al è rivât puntuâl cu lis cartulinis militârs e cu lis tassis; in ritart o mai in chês providencis e structuris che a son un dirit di duc' i sitadins e une prioritât di chei che e àn dât di plui e vût di mancul e a àn plui dibisugne. Il fat che al cressi Udin e Tumieç e a calin i paîs de Cjargne e de mont in gjenerâl al è la prove plui evidente e la condane plui inecuvocabil di une classe ministrative inadate o criminâl.

A onôr de storie e de veretât, al va dit che il patriarcjât di Aquilee e la stesse Republiche Venite a vevin vude l'inteligjence e la cussience di judâ la int plui lontane e fûr di man cun agjevolazions e provedencis e esenzions. Chest tant cui cjargnei che cu la int des valadis dal Natison o Beneçija (=Venezia). Tocje concludi che la teocrazie patriarcjâl e la politiche rapinatorie de Serenissime a son stadis miôr dai liberadôrs talians e de lôr tant puartade "civiltât dal dirit". Difât si pò dî che la mont e à tacât a lâ denant-daûr a partî de invasion o ocupazion o anession taliane.

Poben, chês cjasis che e àn savût fâ puest a ogni vite gnove ancje cuant che no 'nd'ere, che e àn savût tignî i viei in cjase a murî cun

dignitât ancje cuant che umanamentri a ere grivie, che e àn savût tignî il spolert cjalt e la lum impiade a spietâ che i oms a tornassin dal front o dal mont, cumò che si sta ben, che si à palanchis e comoditâz, che si è passûz e dibot massepassûz, a son sieradis e tes corz là che a scarpetave la mularie al è puest dome pes lisertis ch'a corin e a siminin pal pedrât e framieç des urtiis e pai rais che a tiessin pacjrics in chei cjantons e in chei barcons là che nol mancjave mai un garofolâr o un vâs di camelons. “Al vignarà un timp che tai nestris païs nol cjantarà nè gjal nè gjaline” mi diseve un vieli tai miei agns di Cjargne. E un âtri al zontave rassegnât: “E lis bolps a tornaran là che lis vin fatis cori”.

Cui tornaràjal a dâ vite a chei païs di muart? Cui tornaràjal a fâ cori la canae pes contradis e pes gossignis, a fâ sentâ i viei fûr de parte di cjase, “ognun sentât sot de sô vît e sot dal so fiâr” (Mi 4,4)? Cui tornaràjal a spalancâ chei barcons, a alçâ chei saltei, a viergi chei clostris inrusinâz, a jemplâ di rosis lis lindis des cjasis e di pomis i bearz?

Ogni cjase e jè un'arcje di tesauris rârs di sapience, di passience, di misteris gloriôs tal sens di dolorôs, di liendis, di sperancis e delusions, di vite e di vitis, une antologje di storie, di proverbis, di esperiencis ingrumadis e trasmitudis, une Bibie là che Diu al scrîf lis sôs peraulis mistereosis e si zuje la sô fedeltât, credibilitât e sensibilitât tai confronz dai piçui e dai puars. Ogni cjase e revoche ancjemò il blecâ dai fruz in fasse, il ridi cjantarin de canae inocente e incussiente, i suspîrs e i siums e i turbamenz dai cuarps che si tramudin e si preparin al misteri dal amôr e de vite, lis raris cjarecis e lis tantis barufis dai spôs e gjenitôrs pai mil e mil fastidis e berdeis, il lament incorât dai viei che no viodin l'ore di pojâ par simpri la cjame di un vivi diventât simpri plui pesant, lis prejeris e lis imprecazioms, i rosaris e lis blestemis. Dut sierât, sigjlât, soterât, sparît. Come che a son sieradis e sparidis lis stalis, là che cristians e

nemâi si confuartavin e si sclipivin un cul âtri tune sorte di presepio laic e seguitîf, e là che si tramandave di ete in ete la storie e lis storiis de nestre int. Stalis come glesiis, cui lôr sanz picjâz tal mûr e plens di telis e il gaban picjât fûr de puarte come che il predi al picje la sô munture in sacristie. Dulà esal finît chel odôr di ledan fumant ch'al preparave e al condizionave l'odôr de polente fumant sul taulîr?

.... in tes scuelis

O vuei jentrâ spiritualmentri, pelegrin e penitent, in chês scuelis e scuelutis là che ogni dì i nestris fruz a vignivin dislidrizâz, colonizâz, aculturâz e indutrinâz di mestris, ancje furlans e cui bêz dai furlans, che a vevin la mission di gratâur vie ogni olme e puce e segnâl di salvadi e di barbar, e di insegnâur la sacralitât de patrie taliane, la nobiltât de lenghe e de culture taliane, la furtune di lâ a combati e a murî pe grandece taliane, la religjon dal "credere-obbedire-combattere". Cumò la mission e jè finide par scjarsetât di vitimis, e i templis de culture taliane a son sierâz, come i templis de istituzion gleseastiche.

... in tes latariis

O vuei sentâmi spiritualmentri, pelegrin e penitent, denant di chês latariis nassudis a cjalaval dal secul par iniziative di cualchi anime cussiente e inteligjente e par solidarietât e partecipazon de int. Lûc fundamentâl pe vite economiche di chei agns tormentâz peade a fîl dopli al mont de stale e de campagne e de mont, ma ancje pe vite sociâl e umane, dal moment che tes latariis la int si cjatave plui che no in glesie, parceche si cjatave dute e ogni dì o ancje plui voltis in dì. Pal lat de buinore e de sere, pal formadi e pal sîr, oltri che pes riunions statutariis e di public interes. Al è un motîf di sodisfazion che dibot pardut il segretari al fos il predi, a ricognossiment di une sensibilitât tipiche dai nestris predis pes iniziativais sociâls e umanis e di une stime pe lôr onestât e competence.

...pes pedradis e pai trois

O vuei bati spirtualmente, pelegrin e penitent, chês pedradis e chei trois là che la nestre int e à cjaminât par secui cun scarpez e dalminis e glacins e lassâ la mê puare olme sore de lôr. O ài inmò tai vôi i clas frujâz, cunsumâz, roseâz di miârs e miârs di pas, cun miârs e miârs di cjamis e crôs, eterne e sante e autentiche Viacrucis dal nestri popul tradît, ferît, svilanât, condanât, inclaudât e crucifis. Tantis voltis cence nancje un Cireneo che ti judi o une Veroniche che ti sui il sudôr e il sanc.

...pai prâz e pes monz

O vuei tornâ spirtualmente, pelegrin e penitent, in chês valadis, in chês pradariis, in chês monz, lis monz parsore Davai, in Tarlesse e in Suèlies e in Primant, là che il cjant dai ucei e il baiâ dai cjans al ere compagnât dal batit regolâr e armonic dal falcet su la batadorie e la int si clamave di un prât al âtri. Al è lassù che o ài sintût, di frut, i prins scriûlis di stali in stali, di mont in mont, biel che la gnot e invuluçave dolce e malinconiche ogni robe e i cristians si preparavin a distirâ i vues madûrs par jessi pronz tornâ a frontâ la fadie al prin cricâ da l'albe.

Cumò chel mont, il nestri mont, al è finît o al è in penose angunie e il cjant dai cristians e dai lûcs e des robis al è cessât o si è trasformât in lament. In tal vanzeli al è scrit che ancje i clas a puedin berlâ (Lc 19,40). E i clas, lis pedradis, lis cjasis, lis stalis, lis glesiis, i simitieris, i prâz, i boscs, lis monz, dut un mont e dut il mont de Cjargne e di chês âtris parz di mont, tant di ca che di là da l'aghe, lis valadis de Tôr e dal Natison a berlin cence peraulis, cence vôs, cu la vôs dai faz, il tradiment, il sassinament, il gjenocidi, la distruzion economiche, sociâl e culturâl operade in progression sistematiche dal stât talian, de ditature fassiste, dal regim democristian, dai partîz di ogni colôr e savôr, de regjon autonome.

Veiso presint “Il berli” di Munch, chel frut ch'al berle tal mieç de

strade cun tante disperazion che no ven fûr nissune vôs? Il berli che o stin fevelant nol è il berli angossiant, intolerabil, di une persone sole, ma un berli corâl, di duc' i fruz des monz, e dai viei, e de int che e jè muarte di tribulazion, e di chei che e àn scugnût partî cul cûr sanganant. E nol è dome il berli de int ma il berli di dute la nature, cjapade dentri te ruvine dal om e comprometude insieme cun lui tune spirâl mortâl.

In cheste ore di Vinars sant pes nestris comunitâz di mont, no si pò no ripeti l'improperi che la liturgje e dopre passion dal Signôr: "Popul gno, ce ti àno fat? Cuant ti àno maltratât? Rispuindimi!".

Par dutis lis nestris monz, dal Mangart al Matajur

Se mi soi fermât di plui su la Cjargne al è dome pal fat che le cognos di plui, ma il tradiment al è stât gjenerâl. E la tristerie dai oms, di ogni sisteme e strutture, si è sbrocade cun plui violence e prevaricazion sun chês valadis e monz là che e viveve une int di tradizion culturâl e lenghistiche milenarie ma diferente. Ce che no àn fat cuintri de identitât culturâl e religjose de int des Valadis dal Natison e des Valadis de Tôr e ancje de Valcjanâl! E biel che il gnûf stât, cu l'ignorance dai prepotenz o cu la prepotence dai ignoranz, al tacave la sô campagne selerade di svinidrimet di ogni forme e olme di slavitât par puartâ la civiltât fatâl di Rome, la glesie, o miôr la strutture gleseastiche cui vescui e la curie in teste, e à fate la siele piês che e podeve fâ: impen di metisi denant des pioris come il bon pastôr par parâlis o murî cun lôr, si è metude come i mercenaris de bande dai lôfs, vendint la int e i lôr pastôrs, i predis, par trente denârs. Cu la difference che Gjude al à vude l'idee, disperade ma corete, di lâ a picjâsi; Pieri al à vude la furtune dal pentiment; la curie di Udin no si è nè picjade nè pintude ma e continue a fâ predicjs, a pontificâ, a progjetâ, a fâ di mestre come se nol fos

sucedût propit nuje. Adiriture si permet di inmaneâ cunvignis par salvâ la part plui cjare e esposte dal cuarp eclesiâl, che jê e à judât a fiscâle cun tune insensibilitât e une politiche compagne edentiche a chê dal stât.

Une cunvigne diocesane tal contest gjubilâr

In chest an dal “grant Gjubleo” dal 2000, “un tempo nuovo, grande, inedito che Dio ci chiama a vivere, un anno di grazia che ci fa attraversare la soglia non solo di un nuovo secolo ma di un nuovo millennio”, il vescul Battisti, a la fin dal so mandât, al à vude l’idee di convocâ un “Convegno sui problemi della montagna”. Si trate di une propueste e no di une proteste, al fin di dâj al guviêr regjonâl e nazionâl chei progjez concrez che a permetin di fâ tornâ a sperâ la int des monz. “La Chiesa friulana, libera da collateralismi, può diventare soggetto di mediazione presso tutte le forze. Suo compito sarà offrire la ricchezza del pensiero, attento alle grandi encicliche sociali scritte dai Papi del secolo ventesimo e richiamare l’attenzione preferenziale ai più deboli in conformità alla scelta di Cristo”.

Dut chest cjapiel tetoric e ideologic par dînus che di vinars 17 a domenie 19 di novembar, dute la diocesi di Udin si cjatarà in Cjargne par judâ la int des monz a passâ “la soglia della speranza”. Il dut a Tumieç. E ancje chi al sarà alc di dî.

Salvâ la buine intenzion

Denant di une glesie che si cjape seriamentri a cûr, almancul tes intenzions programatics, un dai problemis plui gravis e indilazionabii de nestre realtât sociâl, culturâl, umane e religjose, il distin de nestre int che e sta cjaminant, anzit galopant viers di une fin dolorose e

indegne di une comunitât civîl, la prime reazion e vares di jessi di grande sodisfazion e di fondade sperance. Ancje se la situazion no lasse grandis prospietivis, parceche masse comprometude, ti ven di fâ come che e fâs la int: tentìn ancje cheste, dal moment che “fin che al è flât e jè sperance”. Al è ce che e àn pensât ancje i plui setics, disint che “alc al è alc e nuje al è nuje”. Siguramentri al è plui serio e dignitôs e cristian tentâ fintremai al ultim, pluitost di stâ alì cence fâ nuje, spetadôrs impotenz di une fin imminent.

Duncje la sperance te cunvigne e à une sô fonde almancul psicologjche. Za il fat di fevelâ di chei che nissun nol à mai indiment, se no te cronache nere, al è positîf. In plui, par dovê di onestât e di coretece, si à simpri di presumi la buine intenzion. Jo le domandi par me a di chei che mi critichin par certis mês afermazions e azions che lôr no rivin a capî e o ài il dovê di dâur ancje a lôr chest benefici ancje se no condivîte ce che a fasin. O ài sintudis cjampanis di ogni grandece e sunôr e ancje stonadis.

Plui di un al à dit che si trate de solite passarele di personalitât impuartantis che a rivin chi, a fasin l'ûf come lis gjalinas, e po s'in' van. L'unic vantaç lu varessin i organizadôrs, che a puedin vantâsi di fâ vignî in Friûl o adiriture in Cjargne, duc' i Vips ch'a vuelin. Cualchidun, plui cinic, al à dit che il vêr probleme no jè la Cjargne, che no interesse a nissun, ma la struture diocesane, che e jè in crisi di inmagjne e di progjetazion. Alore une cunvigne di alt nivel j zovares par tornâ sot dai rifletôrs. “E àn di salvâsi sè, che no san ce strade lâ, âtri che la Cjargne!” mi à cunfidât un om di Paulâr che lu riten vonde prudent.

Ma jo o soi simpri stât otimist e cun tune ponte di ingjenuitât. Senò no mi sares metût in tanc' pastiei. Pa la cuâl o vuei dâ at che si trate di une buine idee, di une intenzion meretorie, di une ocasion positive, soledut par chê int che occasions e atenzions and'â vonde pocjs.

Duncje ben vignude la cunvigne e merit a di chel che le à volude. O ài gust che si impiin lis lûs diocesanis e regjonâls sun chês valadis e monz in perpetue penombre.

In eterne penombre e dismenteadis

E che lis valadis e lis monz de Cjargne e de Sclavanie a setin stadis in perpetue penombre e cence nissune atenzion o riguart no dome de bande dal stât e des struturis ministrativis periferichis ma ancje de glesie diocesane lu prove cun dolorose bondance di câs penôs o scandalôs la storie di chest secul. Un storie pôc cognossude e pôc documentade ma no par chest mancual vere, dal moment che lis vitimis no podevin fevelâ e i responsabii principâi no vevin nissun interes a tramandâ la memorie des lôr inicitât e injustiziis. In barbe “alle grandi encicliche sociali scritte dai Papi nel corso del secolo ventesimo” e a la volontât di “richiamare l’attenzione preferenziale ai piû deboli in conformità alla scelta di Cristo” (Battisti, l.c.), la glesie udinese e à tratade la int des monz come int salvadie di colonizâ, di civilizâ, di tignî di voli, di dâur juste chel pôc di assistance spirituâl che no si podeve propit dineâur. Une assistance che plui di une volte e veve dute l’ande di paronance e di control. E a di chei che ju ritignivin i ultims (che pal vanzeli a varessin di jessi stât ritignûz prins, Mt 19,30), ur àn mandât i predis che a ritignivin ultims. Ultims par cualitât pastorâls, par inteligjence, par virtût, par ubidience e afidabilitât. Ancje se denant di Diu probabilmentri a erin dai prins.

La cuintriprove si le à tal fat che nissun dai predis che il vescul al ritignive prins in graduatorie nol è stât mandât tun paîs di mont, tune capelanie o vicjarie spierdude e dismenteade, ma in seminari o in curie o in sitât o tai centris plui impuartanz de diocesi. E se si intivave cualchi perle mandade par câs o in fal sù pes monz, si

spesseave a fâle vignî jù in seminari, a inmufîsi su lis declinazions latinis e grechis. Une volte sole e àn fate la strade contrarie. E àn gjavade une perle, o chel che lu ritignivin une perle, e le àn mandade in Cjargne, cuintri il parê vincolant dal municipi, che al veve il dirit di juspatronât. La destinazion no ere une buse sot di une crete, ma la plêf arcidiaconâl di Tumieç. Il furtunât al saveve latin e grêc ma nol capive nuje nè de int normâl nè tant mancûl de int de Cjargne. Dopo passe trent'agns di vueit, bons. dr. Luigi Tonutti (civ. Donato Romeo), al à vût il sintiment di ritirâsi a polsâ o a meditâ di cualchi bande, là che al vares di jessi ancjemò. Chei che a varessin vût, ancje te brame de int tumiecine, di cjapâ l'ereditât dal grant bons. Ordiner, e àn scugnût tirâsi in bande parceche une laurea in latin e valeve plui di une buine esperience pastorâl. Ma si trate, come che o ài dit, di un câs unic. Par furtune.

Predis cunfinâz

Se a podessin fevelâ lis glesiis e lis statuis e lis canonichis e i trois de Cjargne e dai paîs di mont! Se a podessin contânus des anguniis di predis, isolâz, tajâz fûr, cunfinâz, cun tante fan no dome o simpri materiâl ma soledut di amicizie, di afiet, di stime, di relazions umanis autentichis! Il pinsîr mi va, in chest moment, a chel vicjari di Vinai che, subit dopo de vuere, al è lâf dal vescul Rossi a cirî la caritât pe sô int e par no presentâsi a mans scjassant si è butât jù pai crez de Vinadie. La int, che e veve capide la sô tragjedie plui di chei di Udin, j à fat dôs memoriis di pierre.

Forsit (al è di augurâsal) nancje in te di dal judizi no si savarà des frustrazions, des tentazions, des fantasiis, des morbositâz, des inibizions di chesc' fameis di Diu mandâz sù pes monz a vaî e forsit a pierdi la lôr vergjnitât, come la fie di Jefte (Jdz 11,37-40). Dome che cheste zovine sfurtunade e jè stade dome doi mêis e cu lis sôs

compagnis, biel che i predis des monz a erin sun tun binari muart. Siguramentri no il plui induvinât pe cariere. O sai che la cariere no vares di jessi comprendude fra i progjez di un predi, ma cheste al vares di valê par duc', tacant dai Vip.

O ài cognossût predis che a disevin disperâz: "Jo no vuei murî cassù!". Cuan che o soi jentrâ come plevan di san Martin di Rualp e Val, ai 11 di novembar dal 1968, il provicjari gjenerâl Ganis al à dit in predicje: "Questo è solo un trampolino di lancio". Al à crodût di fâmi un compliment e invezit mi à disnigrât me, come se o fos lâs sù in Cjargne par cuistâmi credit in curie, e so redut la int, che e vignive doprade par fâur fâ cariere e pinitince ai predis. Cuan che mi intivavi cu la int e ur domandavi une man in tes mê s puaris batais par liberâju de pore e de prevaricazion dai prepotenz locâi e comunâi, lôr mi disevin cun dolorose scletece: "Siôr santul, doman o passandoman lui s'in' va e nô o restin culi!". Difât i predis soterâz tai simitieris de Cjargne o a son muarz carampans che no podevin plui lâsint o a son muarz di un colp e no àn rivât a scjampâ. Almancul par vieri.

Un predi anzian, un bon predi, mi à dit, apene che mi à viodût: "Ce àstu cumbinât po che ti àn za mandât cassù?". A un âtri j ài domandât se al cjatave il timp e il gust di studiâ, ancje par tignîsi un fregul agjornât. E lui mi à dit tra il cinic e il comic: "Lis pagjnis dal libri di dogmatiche mi van ben par ongimi cul saìn cuan che mi duelin i genôi".

Païs di serie B

No vuei cun chest dâ l'impression, siguramentri false, che la Cjargne e fos une sorte di Patagonie o di teritori di mission, là che une bande di salvadis a spietavin il missionari dome par gafâlu e fâlu boli in te cite de comunitât. Al è che in tal inmagjnari eclesiastic, i

paîs di mont no erin condiserâz bogns paîs, ancje se la int a ere tantis voltis miôr che no chê de culine e de planure. Si tratave di une zone di serie B, cun int di serie B e cun predis di serie B. Une spirâl perverse che e riscjave di dâ une colorazion false e une valence negative a une realtât dificil, emargjnade, penalizade, ma no negative. Il predi, ch'al rivave sù par cjastic e che si sintive tune sorte di cunfin psicologic, cun pocjs prospietivis di gambiament, o che si butave cun passion esagjerade e esasperade su la religjon, lis funziions, lis campagnis moralistichis e clericâls par riscatâsi denant de curie tormentant la int o che al tormentave semplicementri chê int che no veve nissune colpe dai siei fastidis e des sôs rognis cu la struture.

Il mâl di Cjargne

Al va dit che, tra tantis delusions e frustraziions, in Cjargne e tai paîs di mont e jè fluride tante santitât e virtût e solidarietât autentiche tra predi e int, al pont che si pò fevelâ di un “mâl di Cjargne” o “mâl do mont” come che si fevele di un “mâl di Afriche”. Chei che e àn passât cualchi an sù pes monz, fasint strade insieme cu la int e no cuintri o cence, e àn un ricuart dolç e consolant di cheste int fuarte e rassegnade, dignitose e fatalistiche, devote e anticlericâl, e lis amiciziis fatis sù pes monz e cu la int di mont e àn la saldece des monz, spieli di eternitât. A durin par dute la vite. In chest sens la cure pastorâl sù pes monz, se ti domande tant, ti dà siguramentri di plui. A pat che tu vetis il sintiment e la gracie di incjarnâti e di rivâ no cun ideis di paronance e di svindic ma di fraternitât e di servizi. Dîs agns di Cjargne a puedin scanâti par vinc' ma ancje ti butin par trente. Parceche al è un ambient unic, vergjn, imprevedibil, caraterizât, stimolant.

Aspiet economic

La situazion economiche dal predi e à cjaminât insieme cun chê de int. S'al veve miserie il predi, la int e veve plui miserie di lui e plui bocjs di passi. In cheste suage di miserie o di puaretât gjenerâl, il predi al à vude la furtune di vê simpri la palanche, robe che la int no veve, e in plui al podeve fâ stât sul cuartês o sul animatic (un tant a teste) o sul fugatic (un tant par fûc). In tune comunitât medio-piçule di 300 personis, si podeve vê 300 dîs di messis (magari cjantadis cui ufizis e duncje plui pajadis), un centenâr di kilos di spongje, une buine tasse di lens, un salam o une lujane par purcit e cualchi palancute extra pes benedizions, ch'and'ere tantis e variegadis, come che tante e variegade a ere la dibisugne e la disperazion. Duncje nol murive di fan.

A difference dai paîs de Furlanie, là che and'ere plui parochiis o plevaniis e duncje i plevans a vevin ogni mês la congrue o pae dal guviêr, sù pes monz, par tantis resons storichis e eclesiastichis, lis parochiis e plevaniis a erin pocjs rispjet a lis capelaniis e a lis vicjariis, che no vevin il benefici de congrue. I vescui Rossi (1910-1927) e Nogara (1928-1955) si son preocupâz dai predis di mont soledut par controlâ se a vevin in canoniche une massàrie zovine e se a fasevin cressi lis tessaris de Azion Catoliche. Si à si dâj merit al vescul Zaffonato (1956-1972) che al à proviodût, cun mil trucs, a dotâ ogni glesie, ancje la plui piçule, di un font patrimoniâl par podê domandâ la congrue. A disevin lis lengatis che, se Zaffonato al cjatave un biel clap in te glerie, al spesseave a fâlu diventâ parochie. I plui cussienz però a disin che in grazie di lui ancje tai ultims borcs di mont al rivave ogni mês chel "suplement di congrue" che di simpri al jentrave tes canoniche plui sioris de Furlanie. In plui Zaffonato al à metude sù l'usance di mandâ sù regolarmentri i predis zovins, a fâ un pôc di garzonât, prime di dâur responsabilitâz plui impuartantis. Il lâ in Cjargne nol ere plui considerât un esili a vite

ma dome une trasfierte temporanie, in spiete di tornâ jù. Nol ere ancjemò un rapuart sponsâl dal predi cu la sô comunitât ma almancul nol ere un rapuart confluât.

La splendide figure dal siôr Santul

Se la stragrande majorance dai predis mandâz in Cjargne e à cirût di tornâ tes curis plui comudis e sioris de Furlanie, comprendûz tanc' predis nassûz in Cjargne, and'è però cualchi sflandorose ecezion di predis che e àn sposade la lôr tiere e la lôr int, servinle e onoranle tal ben e tal mâl, te salût e te malatie, fin che no jè intervignude la muart a separâju. Mi permet di ricuardâ il siôr Santul pre Vigj Zuliani, natîf di Davai (al ere a stâ daûr de cjase di mê none) e plevan di Çurçuvint par dute la vite. Al è muart dal 1953, dopo 53 agns di ministeri.

Sot di lui, câs plui unic che râr ma splendit, a son fluridis siet vocazions, siet predis che e àn lassade buine memorie e spindude la lôr vite in Cjargne. Pre Celso Morassi al à fate dute la sô cariere a Cleulis, là che lu vevin mandât par un mê. Pre Zuan Pitt si è sistemât a Zuviel. Pre Laurinç Dassi al à passât i siei agns fra Trep di Cjargne e Zuviel, cun tune parentesi te pedemontane. Pre Vico Morassi al à fate la gavete a Tamau, prime di lâ a covâsi tal ospedâl di Udin. Pre Zuan Pascolini, promovût de capelanie di Trave a l'abazie di Mueç, al à vude la brute idee di acetâ la nomine a assistent de Azion Catoliche. Pre Luciano di Vora al à tacât a Darte e al è muart a Plan Darte o Dimplan, là che si ere sbassât di Monai o Ravasclêt. Pre Ustin Plazzotta al ere capelan a Davasta cuant che al à vude la vocazion di oblât o, come che e strambis la int, "om lâ".

O ài volût ripuartâ chest spieli parceche lu cognos di plui. Ma tal libri di Diu e tal cûr de int and'è ben âtris fameis che a mertin un puest di onôr. Un fra duc': pre Pio Ferrante Polo, di Fôr di Sot, vivût e muart a Preon. Al à scrite une monografie dal titul

significatîf: "Preone: Storia di un paese senza storia". Ancje la sô vite e jè stade cence storie e no par colpe sô. Al ere unevore inteligjent e lu vevin proponût come professôr di matematiche e fisiche in seminari tal puest di bons. Nigris, fat vescul. Ma e àn ritignût che al ere masse a la buine e ordenari par un puest cussì alt. J àn preferît un che siguramentri nol ere a la buine e forsit nancje bon.

I pastôrs fedêi de Benecija

Onestât e "par condicio" e volares che o dedicas il stes spazi a âtris zonis di mont, come il Cjanâl dal Fiêr e la Valcjanâl, lis Valadis dal Tor e la Benecija, ma no ài la stesse cognossince e si trate di situacions ancjemò plui ingredeadis pal fat de lidrîs culturâl diferente. Se in Cjargne la glesie, in sintonie cul stât, no à mostrade particulâr atenzion e sensibilitât, te fasse diocesane di culture e di lenghe sclave, e jè stade perpetrade une autentiche e sistematiche distruzion dal tiessût culturâl. Une gjenocidi che mai si cognossarà te sô crudece, ancje pal fat che lis vitimis no àn podût fevelâ in vite e a son stadis condanadis a la "damnatio memoriae" ancje dopo muartis.

O ài vût par mans un studi su "la Slavia taliane te ete fassiste". Mi plasares, prime di murî, di viodilu publicât par che duc' a sepin ce che di diabolic al è capitât in ogni paîs e in ogni canoniche, tacant des comunitâz slovenis sot dal Mangart, passant pai borcs sfurtunâz sot de cjadene dal Musi, par finî te tragjediè gjenêrâl che e à vût come spetadôr trement e impotent il Matajur. Se la part plui vergognose, adiriture odiose, le à fate il vescul Rossi, Nogara nol è stât di mancûl. Grande ubidience e sotenance tai confronz dal regim e insensibilitât e disumanitât scandalose tai confronz dai pastôrs slovens e des lôr pioris fedelis e disgraciadis.

Un monument grant come une mont al va fat ai predis slovens che, te lôr majorance, e àn vivude la lôr mission in puaretât e dignitât,

spartint la persecuzion e la repression des lôr comunitâz. I lôr vues a polsin bandonâz tai simitieris bandonâz dai lôr paîs bandonâz. Che l'agnul dal Signôr al vegli sore di lôr e ju tegni te pâs. In tal mac, and'è stâz ancje di chei che e àn odeade la lôr lenghe e la lôr int, traditôrs a duc' i efiez, come che al è sucedût cun tanc' predis furlans. Plui di un al è stât ricatât o comprât e si è lassât ricatâ e comprâ, diventant spion dai siei confradis. No àn fate masse biele figure i predis furlans mandâz o cunfinâz ventilà.

No dome no àn imparade la lenghe, ma le àn sbeleade, mortificade, odeade. E di rifles e àn sbeleade, mortificade, maltratade la int. La definizion che si cjate dispes in tes letaris che a mandavin in curie o che a consegnavin a la storie in tai libris parochiâi a ere chê di “salvadis, cjochetons e soledut bausârs”. Il judizi curint che i predis furlans a dan de int slovene e jè chê di int false e par consequence ancje la religjon popolâr, ch'a ere tante e gjenuine, le ritignivin une falsetât e une robe di svinidrîle come la grame. Pulizie religjose che si compagnave a la pulizie culturâl. Po e vignarà ancje la pulizie etniche.

Ancje chi, cualchidun al à salvade la muse de categorie. Mi riferis a pre Agnul Cracina, plevan di San Lenart, che al à scugnût frontâ il tribunâl e clamâ come testimoni rilutant il vescul Nogara par salvâ il so onôr e chel dai predis che a rispietavin l'uniche regule valide de pastorâl: l'incjarnazion. Comprendude o tacant de lenghe e de culture.

Un document scualificant de curie

Dal 1930, in plene crisi economiche, il vescul Nogara al organize la visite pastorâl, la prime, parceche a son dome doi agns ch'al è in diocesi e duncje nol cognos dibot nuje. A la fin de visite, al comuniche lis sôs riflessions al vicjari gjenerâl Quargnassi, che lis

met jù in bon ordin e lis mande par cognossince al forani di San Pieri. A son 13 ponz.

“1 - I sacerdoti nella maggior parte vestono civilmente, meno il collare;

2 - tengono parecchi in casa domestiche giovani che non hanno l'età sinodale (almancul 40

agns, par evità cualchi gravidance suspiete, n.d.r.);

3 - in parecchie chiese le cantorie sono promiscue, che fanno servizio anche nei funerali con

grave scandalo dei fedeli (sic!);

4 - i sacerdoti frequentano le osterie;

5 - in poche chiese si tiene nei giorni festivi il catechismo agli adulti e credo neppure la dottrina ai fanciulli;

6 - quando vi è una solennità in una frazione vi concorrono non soltanto i preti circonvicini, ma anche da lontano, lasciando la propria cura con la sola messa del mattino, quindi senza quanto è accennato al n. 5. E siccome le frazioni delle parrocchie sono numerose avviene che, specie nelle stagioni estive ed autunnali, non ha il popolo altro che la messa;

7 - c'è pochissima frequenza ai sacramenti, perchè il sacerdote non ha orario;

8 - quasi in nessun luogo, se si esclude dove c'è la residenza dei parroci, vi è Azione Cattolica;

9 - in tutta la Forania di S. Pietro, quasi non c'è un prete che attenda allo studio; vi sono di quelli che non intervengono mai alle congregazioni per la soluzione dei casi, come il capp. di O-

blizza don Saligoj ed il vicario di S. Volfango don Natale Zufferli e don Luigi Qualla di Mersino;

10 - le popolazioni slave hanno una tendenza spiccata alla disonestà. Ho constatato al Brefotrofio che un buon numero delle ricoverate sono slave;

11 - la religione di quei paesi è simile in molte cose a quella dei paesi del Meridione;

12 - la moda procace è molto accentuata specie nei paesi attorno a S. Pietro e a S. Leonardo; così pure c'è una vera passione per il ballo;

13 - le chiese e le case canoniche nella maggior parte sono sprovviste dell'assicurazione”.

La letare e parte la date dal prin di setembar dal 1930.

Chest al è dut ce che il vescul e chei che lu compagnavin e lu conseavin e àn viodût e capît di un popul che al veve une lenghe e une culture milenarie, une religjositât gjenuine ancje se popolâr, un isolament totâl, une situazion economiche distastrose, cun fruz che a pativin la fan e int che a 50 agns a erin za viei e dirocâz. Lis unichis preocupacions di un vescul a son il predi cence tonie, la perpetue masse zovine, lis cantoriis miscliçadis, lis sagris là che i predis e van a passisi, la mode indecent (cun cuâi bêz?!), il solit bal e, comedie finâl, lis canonichis e lis glesiis cence sigurazion.

Chest al è il ringraziament e la stime de glesie di Udin pai predis e pe int slovene che le à servide e ubidide ben plui di ce che e mertave. O pensi che, prime di vê il coragjo di fâ cunvignis par salvâ la mont, si vares di vê il coragjo, l'onestât, la serietât di confessâ il propi pecjât e di fâur cognossi dutis lis tristeriis e lis prepotencis fatis in chest secul. Prime di presentâ il document programatic pe resurezion de mont, si vares di mostrâ il document programatic de sô distruzion. E une pagjne come cheste e jè tremendamenti esemplâr.

Memorie negative de religjon

“Parcè vignê fûr cun chesc’ cantins che no menin di nissune bande? Fin che no si liberin di chesc’ vecjo rusins, no podin includisi di gambiâ. Fin che o cjalin indaûr, no podin lâ indenant. E jè ore di finîle cun tune critiche sterpe e inutile, dal moment che il passât al è passât e no podin gambiâlu. E po nissun nol à dute la reson e nissun nol à duc’ i tuarz e duncje nissun nol à dirit di judicâ e di condanâ nissun. La int e à dibisugne di cjalâ indenant, a un avignê dignitôs e diferent, plui che tornâ a russâsi plais che j fasin dome mâl...”.

Dut vêr, dut bon, dut just, dut sacrosant. Ma no podin dismenteâ che la vite e jè simpri une continuitât, là che il passât al influis sul presint. Par podê viergi une gnove pagjne, o varessin di tornâ nô a une viergnitât che no vin. In plui certis feridis, certis umiliaziions, certis injustiziis, certis prevaricaziions no restin dome a nivel di memorie, che si podares ancje dâ un colp di spugne. Al esist un proces che si clame somatizazion. In chest proces une sensazion inteletuâl e psicologjche ripetude in maniere sistematiche no segne dome la mê memorie ma e segne il gno fisic. Mi timbre l’anime e ancje il cuarp e, robe ancjemò plui serie, e ven trasmetude di ete in ete, come che si trasmet il sanc. Pa la cuâl al pò capitâ che jo o sinti dentri di me in maniere reâl lis poris e lis sensaziions negativis dai miei viei. Dome cussì si spieghe la pore de miserie che o vin ancje nô, che o vivin te bondance, e il sens di servilitât e di sotanance in tims là che ognun al pò fâ ce ch’al ûl tun clime di anarchie gjeneralizade.

A cheste regule no fâs ecezion chê esperience fundamentâl de vite che si clame religjon. Trasmeti o ereditâ une esperience positive o negative, liberant o penalizant, no jè propit la stesse robe. E la nestre int des monz, za esponude ai garbins protestanz par vie di une emigrazion secolâr, no à une memorie positive dai predis e dal mont gleseastic. Mê none, che e vignive di chê part anarchiche di Prât di

Cjargne là che al inizi dal secul a batiavin i fruz “Liberò (pensiero)”, e à simpri clamât i predis “corvacs”, ju à simpri viodûz de bande dai siôrs e dal podê e cuintri di chei puars che ju mantegnin e ancjemò lis sintin. Ancje di âtris bandis, o ài sintude une memorie negative dai predis, ancje se cun cualchi biele ecezion. Predis che a barufavin cun dut il paîs par un bal, che a tratavin la canae a sun di sberlis e cence gracie, che a cirivin dome di improibî ancje chel pôc di soreli che la vite ur regalave e che le metevin dute par ricatâju e spaventâju.

Purificazion de memorie

No si pò voltâ pagjne, inludisi di frontâ une strade gnove, fin che no si à sierât e sierât ben cun chê vecje. E sierâ ben al ûl dî fâ lûs, vê il coragjo di cjalâ ancje tai cjantons plui scûrs e di viergi ancje lis pagjnis mancûl esaltantis. Dome cun tune memorie purificate e liberade si pò scrivi gnovis pagjnis e frontâ gnovis stradis. Mi soi domandât dispes cemût mai che la int di une certe età, tirade sù a dutrinis, funzions, confessions e Azions catolichis, no dome no à nissune pice di vignî in glesie ma no mande nancje i fîs.

A part la solite cuistion de massepassuderie, des comoditâz, de secolarizacion e vie, o scuën concludi che la int no à une memorie positive. Vint sintude la glesie, la sô struture e la sô educazion come un pê, no si sint di dâ chel pê ancje ai fîs. Se a vessin une memorie positive, biele, liberant, no dome no varessin disertade la fontane de sapience e dal amôr, ma a laressin ogni dì a urî l’aghe come come che si leve par vieri cui cjaldîrs te fontane de place e a menaressin ancje i fîs e i nevôz a distudâ la sêt di infinît che nus compagne di simpri.

Une leture obietive e coragjose de “politiche” de glesie cui paîs plui puars e bandonâz, soledut cun chei che e àn scugnût frontâ ancje

il svinidrimet culturâl, j zove a la int par liberâsi di chel rusin che e à ingrumât e che j impedis di scoltâ lis gnovis propuestis cun cûr libar di prejudizis e di rancôrs e j zove ancje a la glesie, che e ven cun mancûl arogance, cun plui umiltât, cun plui disponibilitât, savint che se e à ancjemò alc di dî e di ufrî, e à tant di imparâ e di fâsi perdonâ.

Riconciliazion

L'esperience e dîs che, par vê comunicazion, si à di instaurâ une sorte di feeling, di fîl, di colegance psicologjche e di simpatie. Robe che vuè onestamentri no esist fra glesie istituzionâl e popolazion emargjnade, ancje se la int e tât e no fâs plui vueris ideologjchis. E va par cont so, mantignint cu la glesie dome i apuntamenz minimis: batisims e funerâi. Soredut i funerâi. Bonhoeffer al disares che e àn metude la glesie te estremitât de vite e adiriture fûr. Nol è siguramentri il puest ideâl par chê che si autoproclame “mari e mestre”.

Jessi emargjnade dai emargjnâz, jessi bandide dai bandîz, jessi escludude dai escludûz, jessi parade in bande di chei che a son in bande... O crôt che no pò existi condane plui grande. La glesie e à di tignî cont di chestis robis, che a son propedeutichis e prejudiziâls a ogni so progjet o iniziative.

Se mi è permetût un consei (ancje se no si à mai di dâju se no ju domandin), mi plasares che la cunvigne pe resurezion de Cjargne e de mont in gjenerâl e fos precedude e preparade di une cunvigne pe riconciliazion, là il vescul e la curie e i predis e la struture si presentin in genoglon e cul cjâf bas, domandant perdon par vê servide plui la politiche che no la int e par vê vût plui teme de rabie di Mussolin e dai ricaz democristians che no de rabie di Diu e dai siei cjastics pai servidôrs infedêi e fufignoz.

Dome dopo di vê domandât perdon, si pò domandâj a la int se e crôt di dânus ancjemò credit, se e acete che j din une man doprant a fin di ben chê fuarce e chê strutture che o vin doprade a fin di mâl.

Il riscjo de solite liturgje

Un'âtre osservazion che si sint ca e là, soledut tai ambienz decisionâi, e jè cheste. Fin che si fermisi a vaî, a lamentâsi, a gratâsi lis feridis, a tirâ fûr chês di une volte no si cumbine nuje. Se ancje i tims a son chei che a son e la malatie des monz e riscje di jessi mortâl, si à di tentâ instes. Alc al è alc e nuje al è nuje. E à mani, no dinei. Fin che si reste in eterne passivitât e negativitât, no si fâs un pas viers la lûs e la vite. Al è però ancje vêr che tantis voltis, chel “alc” che si propon al è pôc plui di nuje e soledut nol lasse daûr di sè nuje. In chest câs, o preferis il nuje. Parceche fasint un alc che nol à nissune influence a crodin di vê fat cuissà ce e no ur ven nissun scrupul di cussience. Se invessit no fasin nuje, la int si sintarà legjtimade a pretindi il so e lôr no varan nissun alibi.

Mi spieghi miôr cul paragon de lenghe e de culture furlane ridusude a fat ocasionâl e a rût folclôr. Par esempi une messe par furlan une volte ad an o un e vilote che si innee framieç dai cjanz talians e merecans. Dant chel tic, che no ur coste nuje e nol siervis a nuje, a puedin simpri dî che no son cuintri dal furlanò*knyrin cu*

No jè la prime volte che la glesie furlane o, miei, udinese e fâs chestis cunvignis. Ind'â fatis dôs su l'impegn politic dai cristians in cheste regjon cussì mâl metude, mâl dividude e mâl ministrade. Ma i risultâz a son stâz deludenz o inesistenz. Parceche il dut si riduseve a une celebrazion, a une sorte di liturgje là che un o doi o ancje dîs di lôr a fevelavin e la int e faseve come intant messe: pisulâ, peteçâ, pensâ a âtris cantins. No vignive coinvolte a nivel emotîf e operatîf. La stesse robe e riscje di jessi la cunvigne su la mont.

La mê pore, e no dome mê, e jè che dut si viergi e si sieri tal gâr di un o doi mê, cun tune liturgje in pompe magne te solenitât dal domo di Tumieç e te grandiositât de capitâl de Cjargne. Al restarà un document ben fat, di consegnâlu a lis agjenziis di stampe, di metilu tai archîfs des pocjs canonicis restadis viertis e di tramandâlu a la storie. Un di chei documenz che, a scjadence plurienâl (si visaiso i “piani quinquennali” de Russie comuniste o i plans pastorâi de Conference Episcopâl taliane?) a fasin il pont su la situazion simpri plui disastrose de mont, agjornant il deficit residenziâl simpri plui disperant.

A part il lavôr che ogni predi al à fat a pro de sô comunitât, segnant il so non e chel de classe dai predis fra i pôs o unics benefatôrs e amîs fedêi de int di mont (cui rivial a contâ lis vitis martaris che ogni predi al à scugnût frontâ, insieme cu la sô int, par meti sù latariis, asilos e vie?), il predessam al à fate sintî la sô vôs plui voltis e in maniere fuarte, ancje se pôc scoltade. O pensi a la mozion dal clero dal 1967, cu lis 529 firmis, proponude e fate ritirâ dal vescul Zaffonato pai ricaz dal on. Toros e dai democristians; a lis testimoniancis puntuâls e incoradis de semlee dai predis dal 1975 e in chê ancjemò plui epiche dai cristians dal 1977, cul Friûl taramotât e in genoglon. Ancje tai agns plui dongje di nô si à vût cualchi pronunciament o document. Dal 1987 il vescul ausiliâr Brollo, cjargnel e titolâr di Zui, al à promovût un document “sui problemis socioeconomicis de mont”; ancje il grop di Glesie furlane, tal so piçul e te sô posizion suspiete, al à vude simpri grande atenzion a lis Realtâz emargjnadis. Tes nestrîs riunions periodichis di Vençon e ancje in âtris occasions o vin frontade plui voltis la Realtât culturâl, umane e pastorâl dai paîs piçui, ch’a son la carateristiche tipiche des zonis di mont.

Simpri parsore o in bande de int

La cunvigne di novembar, volude dal vescul Battisti come at di atenzion a la mont in tal contest dal Gjubileo o an de liberazion, no va lontane di chest agâr. O sin simpri nô, predis o cristians impegnâz, che o fevelin a non dai cjargnei e de int di mont o a la int di mont. Une robe che e passe parsore o in bande dai direz interessâz, i unics o i prins deputâz a fevelâ di chês robis che lôr lis vivin di simpri, ogni dì, su la lôr piel.

Al sucêt ancje cheste volte ce che al sucêt di simpri in te nestre strutture clericâl. Che a fevelin simpri chei che no àn esperience e chei che e àn esperience a tasin. Ju fasin tasê o no ju lassin fevelâ. I documenz vaticans su la famee, su la procreazion, su l'educazion dai fîs, su la sessualitât juste o deviade, ju àn faz simpri int che no veve mai vude une famee, che no veve mai braçolât un frut, che no veve nai pierdude une gnot par un fî o par une fie che no tornavin dongje, che no àn mai scugnût lâ a cirîju tai lûcs plui malfamâz e pericolôs o a cjatâju in preson. Però a fasin documenz, a sbarin sentencis, a metin proibizions e bastons di ogni bande.

Une lezion di don Milani

Il grant don Milani, che al à vivude l'esperience di pastôr di une comunitât di mont distinate a murî (al veve 44 agns e al ere plevan di 44 animis!), al à une pagjne inluminant e sfulminant sui vescui che a insegnin dut a duc' e su la gracie dal stât, o de situazion là che un al è stât metût di Diu e là che al à competence e autoritât primarie.

Al dîs duncje il priôr di Barbiana: "Criticheremo i nostri vescovi perchè vogliamo loro bene. Vogliamo "il loro bene" e cioè che diventino migliori, più informati, più seri, più umili. Nessun vescovo

può vantarsi di non aver nulla da imparare. Ne ha bisogno come tutti noi. Forse più di tutti noi per la responsabilità maggiore che porta e per l'isolamento in cui la carica stessa lo costringe. E non è superbia voler insegnare al vescovo, perchè cercheremo ognuno di parlargli di quelle cose di cui noi abbiamo esperienza diretta e lui nessuna. L'ultimo parroco di montagna conosce il proprio popolo, il vescovo quel popolo non lo conosce. L'ultimo garzone di pecoraio può dar notizie sulla condizione operaia da far rabbrivire dieci vescovi, non uno. L'ultimo converso della Certosa può aver più rapporto con Dio che non il vescovo indaffaratissimo. E il vescovo, a sua volta, ha un campo in cui può trattarci tutti come scolaretti. Ed è il sacramento che porta e quelli che può dare. In questo campo non possiamo presentarci da lui che in ginocchio. In tutti gli altri ci presenteremo in piedi. Talvolta anche seduti e su cattedre più alte della sua. Quelle in cui Dio ha posto noi e non lui. L'ultimo di noi ne ha almeno una di queste cattedre, col vescovo davanti a lui come scolaretto" (letare al giornalista Nicola Pistelli, dal 1959, pubblicade sul Espresso dopo muart Milani).

La int e jè plui esperte dai esperz

Su lis cuistions de Cjargne e des monz, l'ultime femenute, l'ultim vieli, l'ultim pastôr o menau, l'ultim atresan, l'ultim plevan al pò sentâsi in catedre e insegnâj al vescul, al vicjari episcopâl pe culture, al sociolic prof. Bruno Tellia segretari gjenerâl de cunvigne e ancjemò di plui al luminâr di Rome incaricât de relazion introdutive, il prof. Josef De Rita, pressident dal Censis. Chei chi a varessin di scoltâ, di intepretâ, di coordinâ ce che la int e à dit, contestât, proponût.

In Brasîl, là che lis comunitâz di base e àn cjapade cussience e consistence, nol ven mai un vescul o un teolic o un sociolic a

insegnâj a la int ce che la int e sa plui di lui. I esperz o i teorics a rivin, si sentin, a scoltin ce che la int e à di dîur cun pocje gramatiche e elegance ma cun tante esperience e passion e, cuant che la int si è sbrocade e spiegade, magari blestemant, a metin in biel ordin ce che la int e à proponût o domandât, par fâlu rivâ a lis autoritâz plui altis e competencis a nivel decisionâl. La int e furnis la materie e la sostance e i studiâz j dan la forme. Chest al ûl dî onorâ la int e fâle diventâ proganiste dal so distin. Fin che no si rive chi, cun dute la passience e il timp che al covente par rompi une sotanance e une rassegnazion che e dure di secui o di simpri, si fâs retoriche o caritât, ma no liberazion e justizie.

Dispeâ Lazar e lassâlu cjaminâ

Tal vanzeli di Zuan, il vanzeli de acuile e de vite, e jè une pagjne straordenarie: la resurezion di Lazar, l'amî dal Signôr. E jè ripuartade tal c. 11. In progression cronologjche e emotive a van a dîj che Lazar al è malât. In Realtât no fasin nancje il non; a disin: "Viôt, Signôr, che chel che j vuelis tant ben al è malât". Duc' a savevin che il redentôr di duc' al veve un afiet particolâr pe famee di Betanie là che al leve di tant in tant a sbrocâsites sôs delusions e a cjariâsi di calôr uman.

Se o stin al vanzeli, là che Crist al palese la predilezion dal Pari pai piçui e pai ultims, par chei che a son "stracs e masse cjamâz" (Mt 11,28), pes "folis sfinidis e lassadis dibessolis, tanche pioris cence pastôr" (Mt 9,36), o savin che Diu al ame la int di mont e le à segnade in tal so libri, in tal dret de sô man. E ancje la int des monz j ûl ben al Signôr e a la Madone e ai sanz, so redut chei che a varessin di dâj une man tes lôr dibisugnis di ogni dî. O vin dit e sintût a dî: "Cjargnei cence Diu". No ài mai sintût a preâ, a clamâ, a blestemâ il Signôr cu la fede semplice e passionade de int des monz. Duncje il

Signôr ur ûl ben e al sa che a son malâz.

A passin doi dîs e la malatie si tramude in muart. Umanamentri al è finît dut. Tant al è vêr che Marie e Marte j disin la stesse robe:”Signôr, se tu fossis stât culî, gno fradi nol sares muart”. Come se in te angunie de Cjargne e des monz, Diu si fos platât, al fos stât latitant o adiriture conivent cu la insensibilitât e la inicitât dai oms.

E jè l’eterne domande che si fasisi a ogni disgracie:”Il Signôr viodial o no?”. Che e pò tramudâsi tun’âtre plui radicâl:”Esal o no esal chest Signôr?”. La tentazion terificant che il mâl al seti distinât di Diu o che Diu al veti distinât di molâ i siei agnei tes mans dai lôfs.

Il vanzeli al conte che Crist si è conturbât denant di un dolôr cussî grant e di une pierdite cussî ireparabil e al à tacât a vaî. Cemût no vaî denant de muart di une persone? “Se tu salvîs une persone, tu às salvât il mont” a disin i rabins. Partant, se tu copis une persone, tu às copât il mont. Parceche nol è plui come prime. E se, impen di une persone, tu copis une comunitât cu la sô storie, cui siei tesours, cu la sô unicitât, no copistu il mont? E no àstu di metiti a berlâ disperât come che Rachêl a ere disperade pai siei fîs e no voleve jessi consolade parceche no erin plui?

A difference di nô, che no podin lâ plui in là des puartis de muart, Crist al fâs lusî la sô sovranitât propit là che e finis la nestre pussibilitât. Chê che par nô e jè une tragjediè, par lui e devente une ocasion “pe glorie di Diu, par che midiant di jê al sedi glorificât il Fî di Diu” (Zn 11,4). Se Diu al ûl, al rive a tornâ a tirâ fûr de tiere duc’ i tesours che la inicitât dal om e à soterât e a fâ risunâ chês monz dai scriulis legris di une volte. Ma chi o sin te gratuitât e te impoderabilitât de fede, sigure par Diu ma no par nô.

Mi interesse di plui la finâl di chest toc straordenari. Crist al berle a dute vôs: “Lazar, salte fûr!”. “Il muart al jessî fûr, leât pîs e mans cun fassis e la sô muse a ere invuluçade cun tune sudari. Gjesù ur

dîs: Disleailu e lassailu lâ” (v 43-44).

Il meracul di saltâ fûr de situazion di anugnie o di muart e àn di operâlu prin di dut e soledut la int des monz. O vin di judâju a disleâsi des fassis psicologjchis, ecomomichis, sociâls, ereditariis, umanis che ju tegnin obleâz e ur impedissin di cjaminâ cu lis lôr gjambis. Ma e àn di cjaminâ lôr. Dome cuant che lôr a deventin protagonisc’ e atôrs (e lis cualitâz lis àn), si varà inviade la vere involuzion al proces degjeneratîf in cors di agns e agns. Une involuzion che e devente rivoluzion, liberazion, autorealizazion. I esperz e àn di dâur une man in ce che lôr, te lôr sapience e esperience e sensibilitât, a domandin.

Colegament cu lis regjons cunfinantis

E a proposit di esperz, mi semee vonde discutilis che la siele dai organizadôrs de cunvigne si seti fermade o limitade a Udin. No rivi a capî cemût che no ur à vignût tal cjâf di clamâ, e no dome par une cunvigne ma come consulenz sistematicis, i esperz dal Sud Tirol, de Carintie e de Slovenie, là che e àn une buine part o la totalitât dal teritori in mont e in culine e no àn fat il maçalissi di chi di nô.

Si trate di une contiguitât gjeografiche che e à une sô valence e continuitât storiche, dal moment che o sin une tiere di cunfins e che l’arbul di Aquilee al à sotetât cu la sô ombrene materne e inteligjente dutis chestis popolazions. Dopomai che si celebre vie pa l’istât une messe dai tre popui e no rivi a capî parceche no si pò ancje operâ concretamentri in sintonie e sinergje. O soi sigûr che cun tune agenzie di chest gjenar, il discors de Cjargne e de mont al vares cjapade une ande plui juste e concrete. Naturalmentri, se si à buine volontât e sintiment, si pò simpri viergi chestis stradis sorenazionâls, dal moment che nissun nol è tant dordel di crodi che la sere dai 19 di novembar la mont e seti scapule.

Culture cence lenghe

Par curiositât, e ancje par coretece, o ài passât fûr par fûr il numar speciâl che la diocesi di Udin e à mandât fûr su la cunvigne di novembar. No ài podût no inacuargimi che, in 38 pagjnis di test, no si cjate une rie par furlan/cjargnel e par sloven. Come document che al à par finalitât di riscatâ la mont e cun tun scheme, il scheme n.3, che si intitule “Ambito culturale”, o sin ben metûz.

Gjavant la lenghe e dut ce che al gire atôr e sot dal mût di fevelâ e di esprimisi di un popul, al ven di domandâsi se i esperz di Udin laics e religjôs e àn une idee e une idee juste di culture. No sano che une dai comandamenz di fonde de mont al è chel di no tajâ i arbui parceche lis lidrîs a salvin dut e che la lenghe, e dut il mont culturâl e leterari, si pò metile a pâr des lidrîs? In compens e àn metût un titul merecan, “Workshop”, ai incuintri publics in preparazion de cunvigne. Pò stâj, lu dîs misurant su la mê ignorance, che la pluritât de int, so redut chei che a vivin tes borgadis plui spierdudis e bandonadis des monz, no vetin savût ce che al voleve dî e a setin lâz a domandâ sclarimenz. Duncje, magari par curiositât, e àn rivât a interessâ cualchidun.

Al è emblematic e preoccupant che l’espert diocesan autôr dal sussidi, tal preparâ la schede su la culture, nol veti dade o tentade une definizion di culture, par vê un pont di riferiment e di confront e par fevelâ duc’ il stes lengaç. In plui si à l’impression che par lui la culture e seti chê peade a l’urbanizazion e a la mondializazion e partant il confront cu la culture de mont al è in pierdite e in ritart. Al semee che la crisi de culture de mont e dipendi dal fat che no si è ancjemò urbanizade e mondializade. In pratiche la culture de mont e jè in crisi parceche no jè ancjemò sparide. Une concezion alucinant.

La liste dai furtunâz

Ma no vuei formalizâmi sul “Workshop”, une peraule che, forsit, nus tocjarà di imparâle. Mi sta plui sul stomi la liste dai componenz dal comitat coordinadôr. E jè publicade te ultime pagjne ma e jè la pagjne plui impuartante, dal moment che se un bon comitat al riscje di jessi une buine premesse e promesse, un comitat incompetent al riscje di comprometi e di vanificâ dut.

No vuei jentrâ te santitât, te integritât, te buine volontât des personis. Mi interesse culi la lôr specificitât e se, par cumbinazion, no 'nd'ere, in diocesi, int che e vares vût di jessi sielzude prime di lôr. Cualchidun lu cognos di persone e cualchidun no lu ài mai sintût nè viodût e duncje no puedin incolpâmi di jessi un prevignût.

O volares tacâ dai predis, stant che l'iniziativa e partis de diocesi e che i predis, cence jessi clericâl, e àn ancjemò une funzion significative. E po al è il setôr che o cognos di plui.

Il prin non, scontât, al è chel dal president dal comitat e de zonte: bons. Duilio Corgnali. Al di là des cualitâz organizativis e de inteligence, o crôt che al seti di dirit. Come che di dirit al è pre Pieri Biasatti, diretôr dal consei presbiterâl. No vuei pensâ che lu vetin metût pai agns che al à fat il plevan pendolâr a Tualias, combinant la cure de mont cun chês sitadine di san Zorç. Po a vegnin il dean di Tarvis, Gherbezza bons Gjulio, il dean di San Pieri dai Sclavons o dal Natison bons. Mario Qualizza e l'arcidiacun di Tumieç bons. Agnul Zanello, fresc di nomine ma za superimpegnât a ogni nivel. O pensi che si trati di nominis di dirit, par resons ancje gjeografichis, e no ài nuje ce obietâ. Come che no ài nuje ce obietâ, almancul par une volte, cu la nomine di bons. Marino Qualizza, gno compagn di scuele, che di agns al scombat in prime persone, cun inteli gjence e passion, pe identitât culturâl e religjose de sô e nestre int.

No rivi a capî ce preparazion specifiche al puedi vê il plevan di

Palme, bons, Igjno Schiff, che nol è mai stât in Cjargne o su pes monz, fale cualchi campegjo estîf, e che nol à mai palesade une atenzion e passion particolâr pe int e pes cuistions de mont. Come che no rivi a capî ce che al pò capî pre Antoni Raddi, ancje se al è tal centro pastorâl sociâl e dal lavôr. Pò stâj però che al veti dirit, come che al sosten don Milani, a la gracie dal stât.

Al va dit che, te zonte, a restin tre predis: Corgnali, Qualizza e Zanello. Ancje Crist al veve, dai dodis, tre preferîz: Pieri, Jacum e Zuan. No fâs nissun pecjât di presunzion o di critiche se o sosten che, de terne, la part dal leon le fasaran Corgnali e Zanello. Par mil resons e dutis nobilis.

La liste dai dismenteâz o escludûz

O ài volût cjapâ in man il stât personâl dai predis e o soi lât cu la memorie ai miei cutuardis agns di Cjargne, là che o ài vût mût di cognossi di dongje tanc' predis. O scuen palesâ la mê amarece e sorprese pensant ai nons che a varessin di comparî in tune cunvigne dal gjenar. Di dirit. No un dirit cuistât sentansi su la cjadree juste ma il dirit che al diven di une testimoniance, di une passion, di une dedizion che e dure di agnorums o di une vite. Il vêt dirit, la vere lauree, la vere competence.

A Udin, tai ufizis centrâi, sui libris dal vescul e de curie, no puedin no cjatâ segnât il non di pre Marino Pajani, plevan di Enemonç dal 1960, ma in Realtât dal 1950 e duncje di mieç secul. O chel di bons. Elio Monaco, plevan di Paluce dal 1954. O chel di pre Gjero Marin, cjargnel e dal 1955 simpri in Cjargne, a Paulâr, a Vinai e po in Cjanâl, là che al à cirût di dâj a la int la pussibilitât di vuadagnâsi la bocjade. O chel di pre Primo Degano, plevan di Majâs dal 1963, che al à savût compagnâ la cure pastorâl cu la vite culturâl. O chel di pre Pieri Bellini, plevan di Damâr e Cjavaç, che al è in mont di cuant

che lu àn fat predi, dal 1966 e adiriture di cuant che al è nassût.

No puedin no savê che dal 1972, te plêf di Guart, a son rivâz i miei compagns di scuele e amîs, pre Josef Cjargnel e pre Laurinç Dentesan, che e àn savût inmaneâ une pastorâl atente e rispjetose des ricjecis umanis, culturâls e spirituâls de lôr int. Lis lôr liturgjis a son esemplârs, come che esemplâr e jè la lôr passion e competence in cjamp musicâls, tal salvâ e recuperâ il patrimoni religjôs e culturâl inesauribil des nestris comunitâz. Il vescul, che al à volût cun fuerce cheste cunvigne, nol pò no cognossiju par tantis resons. No ultime pal fat che ogni an al va a passâ lis feriis a Mion, te lôr cure. Il curriculum che a puedin presentâ no esal a l'altece di chel dal arcidiacun di Tumieç? Za che o sin in discors, ancje par resons di simpatie, saressial stât un delit se a vessin clamât, almancul a titul di onôr, il prevost di Zui, bons. Pieri Degani, spedît ventisù dal 1968, te mê stesse anade?

Pa part slovene, no pensi che al vares stonât il non di pre Renzo Calligaro, un furlan di inculturazion *po nasem*, o chel di pre Milio Cencigh o dal gno compagn di scuele pre Natalino Zuanella. Simpri salvant il non dal quartebandiere dai predis beneçans, bons. Pascâl Gujon, novant'agns di vite dute passade framieç e a servizi de sô int.

Chestis lis mê riservis sui nons dai furtunâz e sun chel dai dismenteâz.

Une cunvigne calade dal alt

Pe part laicâl, nol è che o cognossi trop. L'uniche osservazion e jè che si trate, la plui part, di int istituzionalizade e strutralizade. No soi cussì ôc di pensâ che un sindic o un pressident di comunitât montane o un imprenditôr o un sindacalist nol seti competent e nol seti ben cjapâlu dentri tune scomesse che e jè di duc' e che no podin

permetisi esclusions. O dîs che e mancje la base, tal sens di un om, une femine, un zovin, un contadin, un artesan, un muini, un mestri, une persone che di une vite e cîr di judâ la sô int, di onorâ e servî il propi ambient, di tignî dûr in te disgregazion gjenerâl e di proponi e progjetâ tun contest di rassegnazion e di malatie croniche. No si sint la presince des personis plui validis e rapresentavis partint de lôr esperiene concrete. Chei che a puedin puartâ un fregul di sperance contant la lôr fedeltât a la tiere, a la storie e al vanzeli.

Une critiche che le ài sintude di tantis bandis, che siguramentri le varan sintude ancje i organizadôrs de cunvigne e che le ài cjatade ripuartade ancje su la stampe. Il consei pastorâl di Tarcint al à fat lei dal so pressident “un duro documento che bolla l’iniziativa di improvvisazione, contesta il fatto che chi se ne occupa sia designato dalle alte sfere e la sua scelta non venga invece dal basso, dalle comunità cristiane” (Dom, 15.10.2000. pag. 3).

Te stesse pagjne e te stesse sere la cunvigne e ven contestade dal president de Comunitât montane des Valadis dal Tor, Elio Berra. Fra lis tantis causis dal spopolament de mont al incolpe la glesie di jessisi disimpegnade tai confronz des zonis dal cunfin orientâl: “Nel secondo dopoguerra avete visto le genti slavofone delle valli come dei comunisti, avete scelto di abbandonarle e l’impegno della chiesa è stato lasciato a prochi preti solitari. Ora ci venite a dire che è importante frenare degrado e spopolamento. Forse è tardi”(Ibid.).

Stesse critiche tal incuintri di Cividât pes foraniis di Cividât e di San Pieri, là che la presince di pocje int (une corantine di lôr) e ven justificade cul fat che la base no jè stade cjadade dentri e che no si cjate, te cunvigne diocesane, “una chiara definizione di un modello di sviluppo, cristianamente ispirato”. “Ci troviamo di fronte ad un approccio troppo ragionieristico del tema dello sviluppo”. Tant a dî une robe fate a taulin, cun pocje fantasie e cence anime nè amôr.

La disfate de mont e jè la scualifiche dai ministradôrs

La diocesi e alce la vôs, in chest an gjubilâr, a difese dai ultims, di chei plui a riscjo, dismenteâz dal stât e de region. Gandhi al diseve che il grât di civiltât di une nazion e di un stât si lu misure dal mût che al trate lis minorancis, i plui debui come numar, come fuarce politiche e come podê di ricat. Se o volin misurâ il grât di civiltât dal stât talian te sô strutture centrâl e tes sôs structuris periferichis, o vin di lâ a cjalâ cemût che a son tratâz i plui debui. Comprendude la int des monz.

Se jo o ves di dâj une promoziun o une scualifiche a la nestre region no lares a cjalâ cemût che a son ladis e gambiadis lis robis a Triest e a Udin, ma lis robis che a son stadis fatis o no fatis tai paîs, tai borcs, tez zonis fûr di man, là che and'è pocje int e ancje vôz. Siguramentri o lares a cjalâ la situazion di Vinai prime di chê di Tumieç. E cjalant la disfate di Vinai e dai paîs des monz sore Lauc e dai paîs de nestre cente di monz, o disares che la region e à falît in plen. “Un mestri al à di insegnâ prin di dut e sore dut a di chei che no san. Chei che a san no àn dibisugne di mestri”. M'al à dit mê mari, che no veve fat studis di pedagogje e no veve nissune cognossince in Proveditorât. Un guviêr, une ministrazion e àn di spindi e di inviestî e impegnâsi a carat de dibisugne de int e no dal numar dai votanz. Se a privilegjn i granc' e i fuarz e a sbelein i piçui e i emargjnâz a fasin un pecjât denant di Diu e de storie e no 'nd'è gjubileo o barbe di frari che a puedin dâur l'assoluzion.

La glesie no jè miôr dal stât

La glesie e fâs ben a invidâ a la sensibilitât pai fradis plui bandonâz. Ma par podê berlâ cun plui fuarce e jessi scoltade cun plui atenzion e à di vê une “politiche” diferente di chê dal stât e des sôs structuris. E à di jessi diferente e alternative. Dome cussì e pò vê

l'authoritât, e so redut l'autorevolece, par fâ la predicje. Robe che, pal moment, no à savût mostrâ. Cun dute la buine volontât, e ancje tignint cont dai timps calamitôs e di miserie di personâl che la nestre glesie e sta passant, no rivi a viodi une atenzion particolâr, une sensibilitât vive, une premure e un afiet speciâl pe int di mont.

Cuant che, timp indaûr, al è stât gjavât il plevan a Trave, Davai, Lauc e Vinai par mandâlu a Udin, a san Cromazi, o ài fate une "olme" su la Vite catolice intitulade "Justizie distributive". O sai che le àn picjade su la puarte di plui di cualchi glesie sierade de Cjargne.

O vevi scrit, tra lis âtris: "San Cromazi e jè une parochie organizade, cun int preparade, cence nêf e cul autobus, cun comoditât di glesiis e Messis a dutis lis oris. Invezit chestis comunitât, ch'a vevin dome il predi, a restin cence. In non dai plans regoladôrs diocesans, de reson dal numar, de necessitât di rinfuartî il centri. Une regule praticade dal stât, che almancul al à il pudôr di no clamâle pastorâl e tant mancun di comunion. Cheste e jè la maniere che la glesie udinese e trate la int là che si pò cjatâ ancjemò un fregul di gjenuinitât, une tradizion e une liturgje vive, une comunitât naturâl. Paîs che a mertaressin privilegjâz par resons di vanzeli o almancul tratâz a pâr di duc' par resons di justizie distributive, che e oblee a tratâ duc' compagns e dâj a ognun seont la sô dibisugne. Par vieri si diseve "Cjargnei cence Diu". Mi ven di domandâmi se e àn un Diu in curie o a Udin, cun 108 predis. No puedin vignî fûr cul resonament, scandalôs, che lassù a son in pôs. In seminari no rivin a trente. Epûr e àn siet predis, paris spirtuâi, viceretôrs e sielte di animadôrs. Lis muiniis di Mueç, tant puartadis pe lôr santitât e pe feconditât dal lôr convent, no dome e àn il Signôr in cjase e la Bibie e dut il timp di preâ, ma e àn sigurât il predi ogni dì e i confessôrs ordenaris e straordenaris. Robe che si ripet di âtris bandis. Une vergogne e un scandul tant plui dolorôs se si pense che cun chest

implant o varessin la presunzion di frontâ il prossim milenari”.

Paîs bandonâz e glesiis cence predi

No ài nissune invidie se lis muiniis di Mueç e àn il pan fresc ogni dì. No rivi a capî parceche lôr lu àn e dutis lis fraziions e i paîs dulintôr a scuegnin contentâsi di une Messe cuant che e capite e cul orloi, parceche il predi al à di cori di âtris bandis. Il prin di mai di chest an o soi lât a Resie, pal Majnik. Dongje di me, a gustâ, o vevi pre Jan di Reseute. In pôs mêis e jè rivade la disfate. Pre Jan al è muart; i predis che a funzionavin a Resie e Stolvize e a Scluse a son lâz vie e cumò al vares di rivâ un plevan par Scluse e par Reseute. La Val Racolane, cu lis glesiis fatis sù de fede e de fadie de int, a son sieradis. A Resie a spietin la provedence. A Dogne a son usâz a cjapâ ce ch'al ven. Di âtris bandis nancje no spietin plui. A stan cence. Cui tornaràjal a viergi chês glesiis li? Cui tornaràjal a usâ a vignî in glesie int che no à plui memorie di une fieste? Se no si cjate, in dut il presbiteri, un volontari par Resie, al è il câs di sierâ il presbiteri. Se no si cjate un predi zovin che al leti content a viodi di chê int su pes monz che e jè il speli plui sflandorôs des predileziions di Gjesù, al è il câs, anzit l'oblic di sierâ il seminari, che nol dà nissune formazion e sensibilitât pastorâl.

In tun document pe semblee dai predis o vevin dit che ogni glesie e à di jessi vierte te domenie a buinore, cu la possibilitât pe int di fâ ce che in cussience e crôt, doprant la tante buine int che Diu al à metude tai nestris paîs. Al è clâr che se, par lei une pagne di lezionari e par tignî sù un fregul di prejere, e àn di cjapâsi sù e lâ a Udin a scuele di teologje, no lu fasin. E no ur doi tuart.

Tes valadis dal Tôr la situazion e jè edentiche e vie pal Natison e jè ancjemò plui grivie. Par cjatâ un plevan a San Lenart, la seconde parochie e storicamentri la prime de Benecija, e àn scugnût tribulâ

un an a cjatâ in voluntari, pre Rinaldo Gerussi, che al lassas lis spicis dal Montâs e dal Cjanin par chês dal Matajur.

In barbe a dutis lis esternazions vescovîls e clericâls su la prioritât dai paîs di mont e su la siele dai ultims, al reste il fat che un plevan di mont al à almancul tre o cuatri borgadis e glesiis, cun grande distance e scomoditât e cun pocje disponibilitât di personâl che j deti une man, biel che a Udin, là che e àn muiniis e fraris e conseis pastorâi e studiâz, nissun plevan nol à dôs glesiis, ancje se al pò lâ a pît e cence scanâsi.

Don Milani al à scrit che la siele di Crist di nassi puar, vivi puar e murî puar e jè plui significative che no duc' i documenz dai papis su la puaretât. E la puare int le capis a sec. O dîs une absurditât. Se il vescul di Udin, che al ûl riservâ lis ultimis energjis dal so lunc pontificât a dâur vôs a lis comunitâz mutis de mont, impen di ritirâsi a Tressesim al ves decidût di ritirâsi in tun paisut de Cjargne o de Sclavanie, a tignûr vierte la glesie e impiade la sperance a chei cuatri che a son restâz, al vares fat il plui biel document, e soledut il plui sflandorôs e elocuent, sul so afiet pai ultims.

La glesie no à di pretindi dal stât ce che jê no fâs

In te cunvigne su la mont, che e cjape dentri dutis lis fuarcis politichis e economichis de nestre tiere par une azion corâl a pro de mont malade, si sint dispes une sorte di lagnance dal mont gleseastic tai confronz dal mont civîl par chel che nol fâs. No jè une robe di vuè. A part il fat che bisugnares finalmentri rivâ a une sane laicitât, là che lis cuistions economichis e politichis a vegni tratadis tes sedis economichis e politichis, riservant a la glesie il compit no mancul impuartant de profezie e dal judizi, mi semee che al sares plui just e educatîf se la glesie e fases jê par prime in cjase sô ce che e spiete o e pretint che a fasin chei âtris.

Mi spieghi miei cun tun esempi.

Il vescul Battisti al è il prin vescul, te storie diocesane di Udin, che al veti capide e frontade la cuistion de lenghe e de culture. Nissun vescul prime di lui si ere insumiât di fevelâ di culture e di lenghe furlane, slave e todescje. Se lu àn fat, al è stât dome par improibî, come cun Rossi e Nogara. Il vescul Battisti, di cuant che al è rivât chenti, al à simpri domandât, in duc' i intonos e in dutis lis ocasions, che il stât al rispietas la peraule dade cul art. 6 de Costituzion. Lu à berlât ancje denant dal pape, te sô visite in Friûl.

Pûr palesant la nestre ricognossince par cheste sensibilitât, nô j vin simpri dit che il stât al va indenant seont i siei calcui eletorâi o la sô ideologje e duncje al pò pensâ che j torni cont scontentâ i pôs par contentâ i tanc'. Diferent al è il discors de glesie, che e à di partî des categoriis dal vanzeli, che no partissin di calcui umans o di podê, ma di servizi dai ultims.

Il vescul al fâs ben a fâj la predicje al stât inadempient ma al à di vê la cussience, la sensibilitât, la coerence, la libertât di rivâ prime di lui pes resons profundis e imperativis dal vanzeli. Une glesie che e spiete dal stât e no jè buine di rivâ prime dal stât e cuintri dal stât in tune cuistion di justizie, no à drit di fevelâ. Denant di Diu e jè plui colpevule e denant dai oms plui scandalose.

Cuant che il stât al è plui cussient de glesie

Finalmentri il stât talian al à aprovade la leç su lis minorancis e o vin chel benedet o maladet timbro di legjtimazion che il Vatican al spietave par dânus il nestri drit originari e inalienabil di preâ cu la nestre lenghe e muse e culture. Cumò che il stât al à firmât, il Vatican nol firme. Difât o vin il lezionari pront di passe un an e no podin doprâlu parceche un mone di vescul o di gardenâl nol met la

sô firme.

In chest câs, la glesie no dome no jè diferente e alternative a un stât latitant ma e jè cetant piês, parceche no rive cul so vanzeli là che a rivin i calcui cinics di un stât prevaricadôr e ignorant. A chest pont, il vescul, se al fos cunvint, libar e serio cun ce che al à domandât e insegnât di simpri, al vares di metisi de bande dal so popul e invidâlu a une disubidience corâl in non dal vanzeli. Senò nol è de nestre bande, de bande dai piçui, de bande dal vanzeli e dut ce ch'al dîs e al fâs al è fum tai vôi e demagogje.

Stesse robe cu la cuistion de mont, par chel che al riguarde la part eclesiâl. La glesie di Udin e à di jessi diferente e alternative al stât; e à di meti là che lui al gjave, di onorâ là che lui al disonore, di servî là che lui si servis, di abondâ là che lui al è scjars e inesistent. Se il stât al fâs murî in alt par concentrâ in bas, la glesie e à di gjavâ in bas par tignî in vite l'alt. E vie.

La province de Cjargne. E la diocesi di Zui?

Si sint a dî che la province de Cjargne e sares une buine strade par podê dâj fuarce contratuâl a la mont. No soi un espert e o sai che plui si multipliche la burocrazie e piês al è. Però se di âtris bandis a fasin gnovis provinciis, no capîs il parcè che ancje chi di nô no si puedi fâ chel tant. Cheste però e jè un sielte che e à di fâle la int e lis struturis ministrativis e politichis dal teritori. No son cuistions religjosis. Però o ài let sun tun numar dal setemanâl diocesan, il prin di lui di chest an, che la glesie e jè preocupade “perchè salta una richiesta tra le più pressanti”, la province cjargnele. E biel che o stavi rumiant sun chest fat, mi è rivât un biel studi, so redut puntuâl e passionât, di un amî cjargnel, il dr. Alfio Englaro di Paluce. Il titul al ere significatîf: “Una legittima aspirazione della Montagna Friulana: la Diocesi di Zuglio - un fulgido passato che permea il presente”.

In te sô ricjerce, il dr. Alfio al fevele di resons storichis e di motivacions socio-economichis, cun tune tabele des regjons talianis e dal rapuart fra abitanz, provinciis e diocesis. Cence fâle lungje, il Friûl V-J-, cun 1.250.000 abitanz, al à 4 diocesis. L'Umbrie, cun 800.000, and'â vot. La Calabrie, cun 2.000.000, and'â dodis. L'Abruzzo, cun 1.200.000. and'â siet e la Basilicade, cun 600.000 abitanz, and'â sîs. “Appare quanto meno contraddittorio l'atteggiamento de La Vita Cattolica che invoca la Provincia della Montagna, quando la Chiesa Udinese nega qualsiasi autonomia pastorale alla medesima Montagna, le cui Valli appaiono sempre più lontane ed emarginate”.

Il bon dottorut, ch'al è ancje un bon cristian, al prospiete cheste diocesi di Zui, “con sede a Zuglio”. Cjapant dentri i 28 comuns de Cjargne (kmq 1.230, abitanz 41.000), i comuns dal Cjanâl dal Fiêr e de Valcjanâl (kmq 872, abitanz 14.000), si vares une diocesi di kmq 2.102, cun 54.000 abitanz. A la diocesi di Udin j restaressin simpri 434.000 abitanz, ben plui de int des diocesis di Ts, Go e Pn. In alternative, al dîs il nestri amî simpri conciliant, cence rompi l'unitât teritoriâl de diocesi di Udin, si podares optâ no par un vicjari episcopâl (lu à ancje lis muiniis) ma par un vescul ausiliâr, titolâr di Zui, ch'al vîf a Zui e al à une incariche specifichis pe pastorâl des monz. Un pont di riferiment e di colegament fra i predis e la int des monz, par frontâ insieme une emergjence che e riguarde duc'. Se la glesie e ûl jessi coerente e vê autoritât sul stât, e à za sot man la possibilitât di dâ la prove provade e cence nissun permes.

Il dr. Englaro, batint su la presince dal vescul a Zui, al à metût ancje il dêt sun tun'âtre plae. La glesie-mari, sintude come glesie e come mari des plêfs e de int de Cjargne, e jè la glesie di san Pieri e no Tumieç, sintût plui come une glutidôr che al glot un par un duc' i paisuz. O sintivi dispes a Rualp la detule: “Al è scrit Tol-mieç, ma al tol dut”.

Mi maravei che la glesie, che si fonde su la memorie dal faz e dai lûcs, no veti pensât ancje par un moment che il lûc deputât a rapresentâ la *christianitas* cjargnele al è san Pieri, là che duc' si sintin fîs e nissun no si sint discriminât. Parcè no àno programade almancul une celebrazion eucaristiche o un dai doi momenz de cunvigne, magari chel di sierade, preferint invezit la realtât di Tumieç, plui comude e plui furnide di salis e salons, ma spieli dal faliment de politiche pe Cjargne? Ancje i simbui e i lûcs e àn la lôr impuartance. Chest a varessin di savêlu so redut chei che a partegnin a une realtât culturâl e misteriche come la glesie, che si fonde propit su la simbologie e su la sacralitât dai lûcs.

Un vicjariât episcopâl pes minorancis e un diretori

Ce che si domande pe int de Cjargne, il teritori plui grant e plui compat de nestre mont, al vâl ancje par chês âtris zonis, cun in plui une sensibilitât specifiche pe diversitât e peculiaritât culturâl e lenghistiche. Al è evident che no si pò fevelâ di un avignî des zonis di çocje slovene cence une leç di tutele pe lenghe e pe culture slovene e une pastorâl che e tegni cont di cheste peculiaritât e ricjece. A son agns che si domande un vicjari episcopâl pes minorancis e in particolâr pai slovens. Ce si spietial?

A chest proposit al va dit che no si pò lâ indenant cun cheste anarchie liturgjche, là che un predi al dîs Messe par furlan, un par talian, un par sloven, un par inglês, un al cîr di valorizâ il patrimoni liturgjic, popolâr e musicâl e chel âtri al bute jù dut. Bisugne che la diocesi e buti fûr, impen di tanc' documenz inutili, un diretori liturgjic-pastorâl, che al rispiete e al onore la diversitât culturâl e lenghistiche e al tutele ancje lis sieltis pastorâls che a son contestadis par resons politichis o ideologjchis. Nol è pensabil che un predi al vegni tacât dai slovens parceche al fâs par talian e tai talians

parceche al fâs par sloven. E la stessee robe e vâl pai paîs a majorance furlane.

Un âtri criteri, ch'al parten plui al sintiment che a la teologje, al è di cirî une continuitât pastorâl almancul di fonde. Nol è acetabil che in tun paîs là che un predi e une comunitât e àn lavorât agns e agns par incjarnâ la lôr fede te lôr culture, come che a racomandin i tanc' (ancje se teorics e inaplicâz) documenz magjsteriâi, al capiti un che le pense dut diferent e in tun pâr di setemanis al disfe dut.

Cuant che mi àn fat plevan, trentedoi agns indaûr, mi àn fat firmâ une cjarte là che mi impegnavi a tignî cont dal patrimoni artistic e di dut il furniment de glesie e de canoniche. A esistin ancje i patrimoni culturâi e religjôs, la ricjece spirituâl, che nissun predi nol à il dirit di alienâ, brusâ, soterâ, eliminâ. Al è un sacrilegjo, come butâ par tiere lis particulis consacradis.

Par finî

O ài volût e cirût di rifleti su la mont, su la sô malatie e su lis iniziativis diocesanis par ripiâ une salût forsit masse comprometude. No soi un grant esport e nancje no ài te sachete la ressipte risolutorie. O ài fevelât forsit plui cul cûr che cul cjâf o, come che al dîs don Milani, cul cjâf guidât dal cûr, dal afiet par cheste mari e cheste scune.

O ài cirût di salvâ la buine intenzion dai organizadôrs e ancje la lôr volontât di impiâ i rifletôrs sun tune part impuartance de nestre realtât diocesane e regjonâl par solit in penombre o in plene scuretât.

No jentri in soluzions praticis, che e àn di cjatâlis chei che a vivin plui di me la cotidianitât e la (a)normalitât di chês zonis. In chest contest e pò lâ ben la gnove provincie e dutis chês structuris che a judin. Plui che dâ bêz, che a podaressin ancje fâ diventâ la int plui

pegre, mi plasares che a vignissin dadis dutis chês agjevolazions che a coventin par meti la int in condizion di autentiche paritàt. Mi riferis ai exercizis publics, ai traspuarz, ai servizis sociâi e sanitaris, a la scolarizazion. “La piês injustizie e jè chê di tratâ in maniere compagne int che no jè compagne”. Lu à dit don Milani. Pa la cuâl, condizion prejudiziâl par ogni discors e progjet su la mont e jè chê di meti la int des monz in situazion paritarie cu la int de culine e dal plan. Dome cuant che si sarâ colmât il disnivel tra lis comuditâz, i servizis e lis structuris dal plan e de sitât cun chel dai paîs di mont, si podarâ tacâ a resonâ. Prime di chel moment si fâs dome vueide retoriche e demagogje di bas profîl. Fin che restâ in mont al è penalizant pal lavôr, pe scuele, pe salût e par dut, o stin butant fum tai vôi e inludint i ultims “mohicans” ancjemò restâz tes lôr riservis.

Un progjet pe mont nol pò no tignî in prin plan l’aspîet culturâl te sô globalitàt di lenghe, tradizion, usancis, musiche e vie. Al à di jessi un progjet che al privilegje la persone, e la persone che e vîf in mont, cun atenzion dute particulâr al piçul. Se si à voe di fâ un lavôr costrutîf, si à di vê un contat sistematic cun chês realtâz economicis e politicis a cunfin cun nô che a vivin la stesse situazion di mont e le àn risolte cun plui sensibilitât e inteligjence. Une regjon autonome di non e di fat e à di rivâ a imbastî un so sisteme di relazions extrateritoriâls. No rivi a capî cemût mai che la mont e dà di vivi a la int dal puest e in plui e devente une ricjece par dute la comunitât in Sûd Tirol e in Carintie e culî di nô e jè diventade un faliment e une tragjedia. Al ûl dî che il stât e la regjon no san fâ i conz e no àn nissune sensibilitât nè onestât.

Par chel che al riguarde la glesie, prin (o plui) di fâ predicjs a la comunitât civîl, che e cîri di recuperâ un rapuart positîf cu la int des monz fasint un grant esamp di cussience, domandant perdon di dut ce che e à fat o no à fat fin cumò e impegnant dute la sô potenzialitàt e la sô disponibilitât par chê int che e à plui dibisugne e che e jè

stade plui trascurade. Cun umiltât, libertât e creativitât. Se il vescul j ten a la int des monz, al cjape i dîs o vinc' predis plui in viste, i siei cjavâi di corse, lis "perlis" de diocesis, e ju mande su pes monz. E lôr, che e àn simpri batût su l'ubidience, no varan nissune dificoltât a ubidî e a dâ l'esempli.

La vision di Ezechiel

Pal rest, o savin che la vite dai oms e dai popui e jè tes mans di Diu. Un Diu che al dà la vite e ancje la muart e che al è bon ancje di riscatânus de muart. O finis cun tun toc dramatic e profetic dal profete Ezechiel, il profete dal esili. Al è contât tal c. 37 e al ven let come prime leture te Messe dai sanz Ermacure e Furtunât.

In spirt al viôt une planure plene incolme di vues. A son secs incandîz. Il Signôr j domande: "Fî di om, puedino tornâ a vivi chesc' vues?". Al rispuint: "Signôr, gno Diu, tu lu sâs dome tu!". J dîs: "Profetiur ai vues e disiur: Vues incandîz, scoltait la peraule dal Signôr. Il Signôr, gno Diu, ur dîs cussì a di chesc' vues: Ve', jo us metarai dentri il spirt e o vivareis. Us darai i gners, us fasarai cressi la cjâr e o slargjarai parorevie la piel; po us darai il spirt e o vivareis. O ricognossareis che jo o soi il Signôr".

No bastin i vues, vadì la part matereâl, e nancje i gners e la piel, vadì lis struturis e dutis chês provedencis che un popul al à dirit di vê pal fat di jessi popul e di jessi debul. Par vivi al covente il spirt. Il spirt dai cjargnei e de int des nestrîs monz, che e àn mostrât di vê tai tanc' momenz dificii di une storie ingredeade e intrigade e che salacôr une certe bondance di palanchis e di comoditâz e à fat smamî. Un spirt che al cjape dentri l'inteligjence, la volontât, la determinazion, l'ostinazion, la voe di vivi e di lâ indenant. Un spirt che al cjape dentri ancje la religjon, il rapuart filiâl cun Diu, il rapuart vitâl cui nestrîs muarz che cu la lôr fadie e la lôr virtût e àn

santificade la nestre mont. Un spirt di fiducie in se stes e ancje in tal avignî, savint che il Signôr nol siere mai dutis lis puartis e al compagne cu la sô provedence i popui te strade che lui al à destinade tal so progjet di vite e di misericordie.

Visepente, ai 23 di otubar dal 2000, tal complean di mê mari Eline, di Davai.

pre Antoni Beline